

82* afrontarse con le zente del signor Sophis, el qual proseguiva l'impresa sua et vegniva avanti. Et, per quanto se diceva, el signor turcho haveva dà ordine ai suo' capi et governatori, che, pervenuto ai confini, dove se diceva trovarse el signor Sophis, volendo quello procieder avanti, dovesseno subito quello avisar, et aspetar novo comandamento: qual era, dovesse far fati. Et non vegnando più avanti, dovesseno tuor l'impresa sopra Anaduli (per imputar quello esser stà causa de haver allecto et inducto el dito signor Sophis vegnir tanto avanti, et tuor le arme contra el signor turcho) e debellar quello, con ajuto e soccorso del signor soldam, el qual se dicea mandar a tal expedition 5000 mamaluchi; et questo per confinar dito Aliduli con l'uno e l'altro potentato. Dicevase *etiam*, el signor Sophis dovea redurde con le zente sue a uno loco, nominato Arzingnam, che hê dentro de li confini del turcho; dove havea destinato far una forteza, e li fermar la sua sedia, per aver più facilità ad invader el paexe del turcho, e per aver reduto a salvarse in ogni advento. Et tiense per indubitato, fermandose esso signor Sophis in Arzingnam, tuta la Caramania et altri luogi et paesi *circum circa* se reduriano a la devotion de esso Sophis, per esser inclinatissimi a quello; tanta hê la estimation e fama di quello, per esser signor liberalissimo, et far optima compagnia a tuto homo. Et hê homo valoroso, de gran spirito et animo; et hê zovene de anni 24 in circa; e tuti li suo' seguazi portano le berete rosse, et hê nominato signor de la testa rossa. Et questo hê quanto ha possuto intender de li andamenti de le cosse del dito signor Sophis, et provision fate per el signor turcho.

A dì 27 ditto.

Per relation del patron del gripo de sier Francesco Loredan, venuto da Scandelorum, del qual luogo partite hosi. Et in questo zorno hê stà referito a' diti magnifici signori rectori, come el signor turcho im persona cavalcava a l'impresa contra el signor Sophis. Prima tentò voler mandar uno suo bassà con li janizari; i qual non volseno andar senza la persona del signor, *adeo* che li fu forza lui im persona cavalchar. Et have dito al signor de la Satalia et a quel del Cogno, suo' fioli, che *etiam* loro habiano con le sue zente a montar a cavallo. Et che Camali era ussito del streto, per quanto se diceva in quel loco, con vele 25.

A dì 29 dito.

Per letere havute da Saline, per relation data per sier Hironimo de Matio, patron de nave, che heri sera zonse li con sali per Baruti, cargati a Spina Longa, venuto da Constantinopoli, del qual loco partite a dì 15 del passato. Dice come Camali, con una barza et uno schirazo grosso, cargo di rame, et do fuste grosse, era in bocha del streto per ussir et andar in Alexandria; et che li corsari da Rodi li haveva l'occhio a dosso, et tegnivano per spia a Syo uno bergantin armato, per traversarli la strada e prenderlo se potrano. Dice *etiam* haver per bona via inteso in Constantinopoli, come, a la Cimera, el signor turcho haveva fato cavalchar sanzachi 8 per destruzer quelli albanexi, che mai non cessano di assassinar sì turchi come altri. *Præterea*, come el signor Sophis se atrovava a presso Trabesonda con grande exercito, et haveva preso molti luogi del turcho, et per zornata andava prosperando, in modo che in Constantinopoli si stava con gran terror; et che le zente de la Natolia si acordavano con dito Sophis per tal modo, che lo exercito del dito Sophis ogni zorno più augmentava, et quello del turcho indebeliva; et che andavano anche mal contenti et con molto timor, per el seguito grande et felici prosperamenti ha esso signor Sophis; et che 'l turcho haveva spazato Carzicho bassà, per fortificar li dardaneli de Mar Mazor, per dubito non siano tolti dal prelibato Sophis. Dice *etiam* dito patron, per el tempo hê stato in Constantinopoli, esser stà mal visto zeneralmente da tuti, sì grandi come piccoli, et aver havuto tanta mala compagnia quanto mai fusse fato a la nation.

A dì 22 octubrio. Fo consejo di X con zonta. 84 Et fu preso far el ponte di Rialto, di piera tutto, con le gavarate di alzar in mezo; el qual ponte è di legno et è vechio, menaza ruina. Et fu preso tuor ducati 100 al mexe di l'oficio di sal, di, per tal efecto; e che diti provedadori lo fazino far, come *etiam* hanno (fatto) far il fontego di todeschi, el qual è quasi compito.

A dì 23. Da poi disnar non fo 0; colegio di savij.

A dì 24. La matina vene in colegio l'abate di Borgognoni, qual ha 'uto letere di Roma, di la expedition in concistorio di le bolle dil vescoadi di Cremona. Et vene con il padre et soi parenti, vestiti di scarlato, a la Signoria, alegrarsi e ringratiarla.